

求恕齋
叢書

唐賈耽記邊州人四夷道里考實二

唐賈耽記邊州入四夷道里考實卷二

錢塘吳承志纂

吳興劉承幹校

登州海行入高麗渤海道里考實

登州東北海行過大謝島龜歆島末島烏湖島三百里
渡烏湖海至馬石山東之都里鎮二百里東傍海壩過
青泥浦桃花浦杏花浦石人汪橐駝灣烏骨江八百里
乃南傍海壩過烏牧島貝江口椒島得新羅西北之長
口鎮又過秦王石橋麻田島古寺島得物島千里至鴨
渌江唐恩浦口乃東南陸行七百里至新羅王城自鴨

涿江口舟行百餘里乃小舫沂流東北三十里至泊汭口得渤海之境又沂流五百里至九都城故高麗王都又東北沂流二百里至神州又陸行四百里至顯州天寶中王所都又正北如東六百里至渤海王城 蒙按登州今山東登州府本志河南道下云登州東牟郡中都督府如意元年以萊州之牟平黃文登置神龍三年徙治蓬萊縣四蓬萊牟平文登黃今附郭縣尙爲蓬萊外屬文登黃名俱未改東北海行過大謝島龜欽島末島烏湖島三百里渡烏湖海至馬石山東之都里鎮二百里東北海行謂渡東北海峽元和志云登州北至海

三里西至海四里當中國往新羅渤海過大路新羅渤海大路卽唐恩浦鴨綠江兩道過字據寰宇記當衍州北三里已至海路綴在西舟行之道由西轉東北非直向東北行明一統志云新開海口在府城北宋慶厯開濬池引海水置刀魚寨以備北虜本朝環以磚城建帥府於此方輿紀要云宋置刀魚巡簡水兵三百戍沙門島備禦契丹仲夏居鼉磯島秋冬還南岸相傳此卽刀魚船所泊洪武九年知州周斌奏置海船運遼東軍需下引海道考云由新開海口西北至沙門島六十里又正北行一百二十里至砣磯島又東北至欽木二島六

十里又北至南半洋六十里又北至北半洋二十里又經雙島洋頭窪黃洋川平島和尚島共二百餘里至遼東鐵山旅順口通計五百五十里海道考所云爲明時運道依宋迹上推卽唐道五百五十里細數止五百二十餘鐵山至旅順口舊徑尙有三十略去不具元和志下條敘此段界徑云正北微東至大海北岸都里鎮五百二十里五百亦有零數此記從略寰宇記二十作三十三字爲誤沙門壘磯二寨並見王存元豐九域志壘磯字作馳基今本譌作馳基滿洲源流考引宋會要云徽宗政和八年五月臣僚言登州與渤海相望熙甯中

巡檢每季下馳基島駐劄以馳基石爲界自北朝通好
不曾根理深慮渤海相近作過則馳基寨孤立乞以末
島嗚呼島爲界併欽島置卓望兵令戍守往來巡邏馳
基鄰接欽島是卽砣磯末島嗚呼島並仍唐舊名嗚呼
卽烏湖方讀略異正名未改末島卽木島今通名欽島
北曰大欽南曰小欽直省地輿圖別作沙欽甕欽其北
諸島通目爲黃城或作隍城水道提綱旅順海口下云
南過海至北黃城島僅百餘里黃城一名又分出南北
乾隆一統志云南隍城島在蓬萊縣北四百餘里又北
九十里北有北隍城島南爲山東界北爲遼東界實諸島

聯絡之首四百據府界至下東北至遼東金州界旅順
口五百里之文參校當作三百兩島俱入蓬萊界四百
爲北島里數誤繫於南下若南島占有此徑加入北島
九十界地已至鐵山尙有何段洋面分入遼東黃洋川
爲旅順界首其南兩半洋以大欽與南黃城舊分汎界
而名南黃城在北界中去今旅順口二百里許卽北半
洋之雙島北黃城差北九十里爲黃洋川之平島其北
又有和尚島今鐵山西十里之海貓島乾隆一統志云
海貓島在甯海縣西南一百六十里去北黃城亦九十
里許是爲黃洋川之首島籌海圖編金川衛圖有和尚

島墩繪在衛東南南關島東方輿紀要又有兩雙島云
南雙島在衛西南百里北十里卽北雙島乾隆一統志
亦有此二島和尚島下云在甯海縣西南二十里雙島
下云在縣西南一百四十五里方向里徑復殊又有小
平島云在縣西南八十五里諸島皆名同非此界中之
島北黃城去小平島不及二百里小平島蓋卽緣此平
島標別爲名和尚島後易名海貓雙島本以南黃城與
北黃城兩島相對得名後通稱黃城名亦湮晦平島朝
鮮八道紀要進貢航海路程尙存其目程徑去三山島
二百里三山島乾隆一統志云在甯海縣南七十里相

近有小三山島三山去金州里數較鐵山差近八十鐵
山偏在西南三山迤東中間尙有差徑方輿紀要引毛
文龍云三山島在旅順東三百里三百無此羸數三字
必衍百里爲正數旅順據舊口言加今徑二十又加北
黃城徑百餘都數實二百二十餘從整約得過言二百
此平島確爲北黃城其下敘至新開海口四程云皇城
島一千里鼉磯島二百里廟島二百里登程八十里一
千及兩二百字皆譌誤皇城亦卽黃城此所云專指南
島一千當從乾隆一統志作九十兩二百依上數推校
亦俱當作一百上百下又闕細數應更補四十兩字廟

島在砣磯西南百里水道提綱登州海口下云蓬萊閣
在府西北北有廟島西北曰大小黑山二島東曰長山
島又北曰侯雞島高山島又北曰鼉磯島稍細又東北
曰碗磯島稍大此敘島名最備碗磯中外一統輿圖作
砣磯與鼉磯不分陳氏倫炯海國聞見錄沿海圖亦止
有砣磯無碗磯疑碗卽砣之誤廟島西南二十里卽舊
沙門島今大黑山沙門爲海運屯站之地明一統志距
府里數亦爲六十寰宇記減十舊寨本置在東元移於
此方輿紀要云明永樂七年山東都指揮使司奏沙門
島守備僅七百餘人難以防禦詔以七百人益之後移

成內地島無居人今遂爲墟其寨至明中葉亦廢輿圖
要覽海道圖登州東北劉家島北繪列島形標作沙門
此爲後徙之沙門水道提綱云長山島之東曰沙門島
在府城東北灣子口之北卽此沙門海國聞見錄沿海
圖作沙磨中外一統輿圖別作礮兩沙門相去約百里
中間隔長山長山名亦出於明季舊曰爲牽衣于欽齊
乘云沙門島相連屬者牽衣大竹一竹諸島牽衣近沙
磨北之大小二竹卽此島籌海圖編山東十四登州衛
圖作碗蟻在備倭所北田橫島東北登州府境圖北界
減短此島截出在外田橫山東惟蓬萊一島西列舊沙

門山東事宜登州營下云海外島嶼東北崆峒半洋西
抵長山蓬萊田橫沙門三山芙蓉桑島長山與蓬萊田
橫聯綴明是碗蟻所撫不同其名至嘉靖時已改方輿
紀要云長山島在府北三十里海中東西長四十餘里
乾隆一統志作在蓬萊縣北三十里東西長三十里若
馬鬣然引縣志云凡海道至登州不得入水城者必於
此駐泊明時嘗命軍士屯田島形斜長東西舉其大略
四十與三十亦皆約數據廣徑言實不及三十據表徑
言又復不止四十去府縣三十里爲其南尾之徑北尾
亘至廟島之東北當增三倍有奇英吉利人金約翰海

道圖說云廟列島最大者爲長山島南角曰淺觜角其下有淺觜向南伸入海半里有餘曰長山尾尾界深淺不一其深二拓之處距淺觜角一里又四分里之一此尾爲輪船所避舊平底運船亦不敢駛入賀氏長齡經世文編載陶文毅進呈海運圖疏云廟島之東有常山頭淺灘宜避常山頭淺灘卽謂長山尾淺界舟行繞出此尾方折北至廟島東北之石堆南又轉西南再折西北而北出此島北角海道圖說云距廟島鎮市東北近海岸之小山有石堆爲長山南面西界又云廟島西北二而爲企望澳泊船處因東面有廟島與長山遮護北

面有長山與小黑山並兩島門之露石西南二面有西
與西南之大黑山并大黑山向東南伸入海之石行遮
護無論何等風潮皆可出入惟冬月多北風不便久泊
除長山北尾及近長山北尾南面之小島間可避北風
餘無穩處北尾南尙有數小島中外一統輿圖誤析出
置在尾北本徑差短海道圖說本圖加長當依之爲據
分數不能細校里數視凡例所云一英里當中國三里
又三分里之一者亦贏出一里又三分里之二蓋英海
里卽出於製圖之鳥度中海里出自船行之更數兩較
與陸徑曲折之差亦相若砣磯島西西南五里高山島

以南有緱雞島緱雞卽侯雞去砣磯爲九英里去長山
必不止一英里十下并有脫字細數不可曉長山爲大
島南尾去城三十里中徑逾倍宋沙門當卽此方輿紀
要引舊志云沙門島西北七十里爲鼉磯島沙門去砣
磯里數止七十亦據此言非元明所徙之兩沙門乾隆
一統志圖亦目此島爲沙門綴在廟島東北其南所直
海岸之山爲田橫與籌海圖編之碗蟻長山不異田橫
東少北又別出長山則分南北兩尾爲兩島與中外一
統輿圖誤同此島長近百里名經數改傳說固宜有歧
全遼志引海道考別云五百五十里蓋自旅順口起抵

海中洋嶋黃城二島約三百里自黃城南抵欽島鼉磯
島約三十里欽鼉二島抵井島約七十里井島抵沙門
島一百三十里沙門島抵新河水關僅二十里沙門亦
緣此改移抵新河水關僅二十里二字當同方輿紀要
作三上一百三十里三本爲二傳寫互譌井島卽侯雞
去砣磯里數依海道圖說爲四十五砣磯去長山北尾
舊志作七十減四十五差數二十五廟島距徑加三十
減兩數餘六十五爲由廟島曲經大黑山東南角口至
長山南尾之數此徑於舊說近合可取以補遺闕井島
以上皆以約言不能憑藉黃城至明末已移失所在大

小二欽亦從通目不詳細分析方輿紀要鼉磯下云相對者爲欽島相距三十里又引或說云黃城鼉磯本一島黃城與砣磯合一中間自無地可以位置二欽大欽去砣磯六十里去小欽爲三十里此移黃城於南半洋界中五十里與大欽止差十里略去此島標著小欽積徑實四十又移其島於此十里并牽砣磯入之砣磯與二欽皆懸空際無著實之地去井島里數自不能不更爲虛衍三十由舊砣磯去欽島之數改異七十必亦出自砣磯去舊沙門之數因沙門之名改屬南尾此數不相應乃移附於井島根迹俱可見舊說不容易此道自